

清

史

稿

清史稿

列傳五十五

米思翰

顧八代

瑪爾漢

田六善

杜臻

薩穆哈

米思翰富察氏滿洲鑲黃旗人先世居沙漠曾祖旺吉努當太祖時率族來歸授牛錄額真父哈什屯事太宗以待衛襲管牛錄擢禮部參政改副理事官討瓦爾喀招明總兵沈志祥從攻錦州明總兵曹變蛟夜襲御營先衆扞禦被創力戰却之順治初授內大臣議政大臣世職屢進一等阿達哈哈番兼拖沙喇哈番睿親王多爾袞攝政諸大臣鞏阿岱等並附之哈什屯獨持正忤睿親王降世職拜他喇布勒哈番肅親王豪格以非罪死鞏阿岱等議殺其子富綬哈什屯與巴哈力持事乃已世祖親政累進世職一等阿思哈尼哈番加拖沙喇哈番十二年獎奉職恪勤諸大臣加太子太保康熙初卒設恪倍米思翰其長子也襲世職兼管牛錄授內務府總管輔政大臣從假尙方器物力拒之聖祖

親政知其守正授禮部侍郎八年擢戶部尙書列議政大臣是時各直省歲賦聽布政使存留司庫蠹弊相仍米思翰疏請通飭各直省俸餉諸經費所餘悉解部由是勾稽出納權盡屬戶部十二年尙可喜疏請撤藩吳三桂耿精忠疏繼入下戶兵二部米思翰與戶部尙書明珠議三藩並撤有言吳三桂不可撤者以兩議入奏復集諸大臣廷議米思翰堅持宜併撤議乃定既而吳三桂反上命王貝勒等率八旗兵討之議者謂軍需浩繁宜就近調兵禦守米思翰言賊勢猖獗非綠旗兵所能制宜以八旗勁旅會勦軍需內外協濟足支十年可無他慮於是請以內府所儲分年發給復綜覈各直省庫金倉粟以時撥運悉稱旨又疏言師行所至屢奉明詔以正賦給軍需恐有司尙多借端私派請敕各督撫嚴察所屬供應糧餉薪芻一切動官帑毋許苛派其購自民間者務視時價支給勿纖毫累民上命如議速行米思翰尋卒年甫四十三上深惜之子祭葬諡敏果時三桂勢方張精忠及可喜子之信皆叛議者追咎撤藩主議諸臣上曰朕自少時以三藩勢日熾不可不撤豈因其叛諉過於人耶及事定上

追憶主議諸臣猶稱米思翰不置米思翰子馬斯喀馬齊馬武皆自有傳李榮保襲世職兼管牛錄累遷至察哈爾總管卒乾隆二年册李榮保女爲皇后追封一等公十三年册諡孝賢皇后推恩先世進封米思翰一等公十四年以李榮保子大學士傅恒經略金川功敕建宗祠祀哈什屯米思翰李榮保並追諡李榮保曰莊愨

顧八代字文起伊爾根覺羅氏滿洲鎮黃旗人父顧納禪事太宗從伐明次大同攻小石城先登賜號巴圖魯予世職牛錄章京旋授甲喇額眞順治初從入關定陝西湖南江南浙江皆在行間進三等阿達哈哈番子顧蘇襲進二等顧八代其次子也任俠重義好讀書善射以廢生充護軍順治十六年從征雲南有功授戶部筆帖式旋以顧蘇及子佛岳相繼卒無嗣顧八代襲世職遷吏部郎中康熙十四年聖祖試旗員第一擢翰林院侍讀學士吳三桂陷湖南遣其將掠兩廣鎮南將軍莽依圖自江西下廣東駐韶州十六年上命顧八代傳諭莽依圖規復廣西卽留軍從征廣西巡撫傅宏烈爲三桂將吳世琮所敗莽依

圖引兵與相合順八代按行諸軍謂結營散亂敵至慮不相應世琮兵至師復敗還駐梧州世琮來追擊卻之順八代策世琮且復至益誠備會除夕世琮以三萬人奄至又擊敗之十七年師進次盤江與世琮軍遇莽依圖病甚以軍事屬順八代偕副都統勒貝等渡江與世琮戰分兵出敵後破其左而合擊其右世琮潰圍出遣精騎追之自殺師進克南寧叛將馬承慶與三桂軍合可十萬拒戰諸將或難之順八代奮入陳諸將皆力戰遂破敵十八年京察掌院學士拉薩里葉方謁以順八代從征有績效注上考大學士索額圖改注浮躁坐奪官莽依圖疏言順八代從征三載竭誠奮勉運籌決勝請留軍委署副都統參贊軍務上命以原銜從征十九年莽依圖卒於軍順八代從平南大將軍賚塔下雲南攻會城順八代議當先取銀錠山俯瞰城內攻得勢及勇略將軍趙良棟師至川順八代策先取銀錠山克會城雲南平師還授侍講學士二十三年命直尙書房累遷禮部侍郎二十八年授尙書三十二年坐事上責其不稱職奪官留世職仍直尙書房三十七年以病乞休四十七年卒順八代直尙書房

時世宗從受學及卒貧無以斂世宗親臨奠爲經紀其喪雍正四年詔復官加太傅予祭葬諡文端又以其貧賜其家白金萬八年建賢良祠京師諭滿洲大臣當入祀者五人大學士圖海都統贊塔次卽顧八代及尙書瑪爾漢齊蘇勒子顧儼襲世職自參領官至副都統孫顧琮自有傳

瑪爾漢兆佳氏滿洲正白旗人順治十一年繙繹舉人授工部七品筆帖式累遷刑部員外郎康熙十三年陝西提督王輔臣叛應吳三桂上命揚威將軍阿密達自江寧移師討之瑪爾漢以署驍騎參領從十四年與副都統鄂克濟哈穆舒琿等自涇州進兵屢破壘斬級數百克寧州十五年大將軍圖海督兵圍平涼輔臣降瑪爾漢還京師圖海請調涼州寧夏固原諸鎮兵進攻興安漢中上命副都統吳丹及瑪爾漢赴請鎮料理徵發兼詢緩急機宜甘肅提督張勇請緩師上命圖海固守鳳翔秦州諸要隘分兵授征南將軍穆占下湖廣命瑪爾漢從十七年授御史十九年穆占師進貴州二十年師進雲南瑪爾漢皆在行間得功牌十二雲南平師還追論征湖南不力援永興致損將士奪功牌九

二十年命巡視河東鹽政御史許承宣羅秉倫劾山西巡撫圖克善令平陽屬十三州縣增報鹽丁加課累民下巡撫穆爾賽會瑪爾漢殿實請免虛報一萬七千餘丁二十五年以按治歸化城都統固穆德不實吏議左遷二十六年授理藩院司務從大學士索額圖等使鄂羅斯定邊界辭辨明析鄂羅斯人折服事聞聖祖嘉其能尋遷戶部郎中三十三年遷翰林院侍講學士再遷兵部侍郎三十五上親征噶爾丹命瑪爾漢駐土木董理驛站以送軍馬廩吏議奪官命寬之三十八年遷左都御史再遷兵部尙書充經筵講官議政大臣四十二年歲饑流民就食京師命與內大臣佟國維明珠阿密達等監賑四十六年調吏部四十八年以老病乞休五十七年卒年八十五上遣內大臣臨奠賜祭葬雍正八年世宗諭獎瑪爾漢謹慎忠厚事聖祖宣力多年完名引退贈太子太傅賢良祠成命入祀乾隆元年高宗命追諡恭勤

田六善字兼山山西陽城人順治三年進士授河南太康知縣時當兵後勞來安集九年巡撫吳景道疏薦才守兼優遷戶部主事監臨清關復監鳳陽倉兼

臨淮關能濫徵革奇羨商民稱便累遷郎中十五年授江南道御史兵部議禁民乘馬六善疏言其不便下廷臣集議弛禁十六年疏言欲安民在勸清吏乞敕各督撫實行薦舉吏部於各督撫莅任一二年後列奏薦舉何人能否察吏安民卽可以鑒別議者或謂舉薦清吏無以處乎不在清吏之列者一難也恐督撫依舊受賄徇私二難也徵糧緝逃處分聖礙三難也然臣謂清吏果得薦舉則爲清吏者見公道尙存益堅其持守一便也羣吏以不著清名爲愧力自濯磨二便也某省有清吏幾人以驗政治修廢三便也天下曉然知有能必先有守風俗不變四便也向日督撫厭憎清吏無益於己今必且卵翼而親愛之五便也不惑於三難力致其五便將循良興起不讓前古矣下部議行尋命巡視長蘆鹽政十七年還掌江南道事康熙元年乞假歸三年補貴州道御史四年疏言兵部議裁山西陝西河南等處兵額三營裁一營遇裁之兵挾久練之技處坐困之時窮無所歸遂爲賊盜請諭總督提督諸臣察已裁之兵如弓馬嫻熟膂力精強仍收入伍自後老弱必斥逃亡不補所漸去者疲卒不慮其



爲非所招回者勁兵可資其實用下部議令各營汰去老弱其年力精壯者仍留充伍又疏言吏部於往日曾行之事率皆援以爲例惟意所彼此莫窮其弊請敕部以上所裁定及有旨著爲例者彙爲一冊敬謹遵守餘仍循舊章得旨如所請七年命巡視京通倉還掌山東道事得旨內升回籍待闕十一年授刑科給事中秩視正四品疏言臣呈居讀上諭以蘇克薩哈爲龜拜仇陷殺其子孫連坐族人白爾赫圖恩予昭雪臣思法律爲天下共者也以滿洲勞苦功高之人因與執政諸臣意見相左輒牽連興大獄恐尤而效之報復相尋借端推刃周禮有八議罪大可減罪小可赦請特制昭示滿洲犯罪非反叛有實迹者一准於律勿妄議株連儲人才固國本於是乎在上題其言下王大臣議從之又疏言聖學宜先讀史史者古帝王得失之林也其君寬仁明斷崇儉納諫則其民必安其事必治其世必興必平若夫苛察因循惡聞過樂逞欲其民必不安其事必不治其世必衰必亂乞諭日講諸臣以通鑑與經史並進得旨俞允尋轉戶科掌印給事中三遷至右僉都御史十三年疏言吳三桂負恩叛逆處

必滅之勢綠旗月餉步兵一兩有奇馬兵二兩有奇甲冑不必堅強弓刀不必精利登山涉水資以先驅臣謂綠旗力雖弱善用之則強心雖渙善收之則衆供給宜足勞逸宜均至先登破陳無分滿漢賞賚公平斯忠勇自奮克佐勁旅以奏膚功今日所宜急計者也下部議鼓勵綠旗官兵敍給爵賞例遵順天府尹未幾復遷左副都御史十四年疏言臣昔爲河南知縣時孫可望李定國尙據雲貴四川其勢不滅於吳三桂金聲桓叛江西姜瓖叛大同亦不異耿精忠王輔臣而當日民心未若今之驚惶疑懼者由其時督撫有孟喬芳張存仁吳景道諸臣敦行儉樸慎守廉隅吏治肅清民生樂遂也宜特頒嚴諭令各督撫禁雜派覈軍實有司或剝民收檢立行糾劾以省民力安衆心師行所至更宜審酌剗禦近見江西浙江報捷諸疏屢言殺賊累萬然必待殺盡而後入閩恐愚頑之民無盡草竊之賊亦無盡臣謂先取精忠則羣賊自息昔姜瓖乍叛土寇羣起瓖滅土寇亦盡其明驗也至三桂狡謀覲以一隅之地困天下全力我卽以天下全力困此一隅三桂授首則四川廣西不煩兵而自定又疏言臣籍

山西與陝西接壤黃河自邊外折入內地至蒲州一千餘里蒲州上至禹門爲平陽府屬河西爲西安有提督總兵重兵駐守自此以北永甯州臨縣爲汾州府屬渡口有孟門鎮高家塔諸處更北保德州爲太原府屬渡口有黑田溝窮狼窩諸處河西爲延安素稱荒野河東爲交城路險山深草竊潛匿請敕巡撫提督分兵駐防又疏言師已抵平涼輔臣迫於必死困獸猶鬪殺賊百不償失兵一宜駐軍城下以逸待勞急攻固原絕其糧道平涼地瘠非比湖南地廣米多可以持久糧道不通人心自散必有斬輔臣獻軍門者若賊東出則東應賊西出則西應疲我師徒分我威力固原圍解賊氣貫通此斷斷不可者也諸疏並下王大臣議行十六年擢工部侍郎十七年以夏旱求言疏言今日官至督撫居莫敢誰何之勢自非大賢鮮不縱恣道府歲納規禮重之以勒索則州縣所屬士民不啻蠶之州縣矣世祖朝山東巡按程衡劾巡撫耿焯江南巡按秦世禎劾土國寶皆置重典天下肅然今巡按久停雖欲議復恐一時難得多人惟有出自上

意欲清一省則選一人遣往不必一時俱發出其不意示以不測使天下姦惡吏不敢恃督撫而肆志卽有不肖之督撫亦莫敢庇貪而害民疏入報聞調戶部十八年疏言國家有錢法以通有無利民用自秦漢及唐宋公私皆悉用錢至金元以銀與錢鈔並行至明中葉乃專資於銀闖逆之亂或沈江河或埋山谷又以貪吏厚藏銀益少民益困今欲救天下之窮惟有多鑄錢鑄錢所資銅六鉛四而可採之山所司每深諱之蓋恐時有時無貽累償稅且上官聞其地開採此挾彼制誅求甚多也臣謂宜令天下產銅鉛之地任民採取有則以十分二輸稅於官無則聽之州縣自行稽察毋使多官旁撓報採多者予議敘則官與民皆樂爲資以鼓鑄錢不可勝用矣下九卿詳議擬例以上得旨採銅關係國計其令各督撫率屬殫力奉行六善以老病乞罷上不許二十年命致仕三十年卒於家年七十一

杜臻字肇余浙江秀水人順治十五年進士改庶吉士散館授編修累遷內閣學士擢吏部侍郎國初以海上多事下令遷東南各省沿海居民於內地畫界

而設之禁界外皆棄地流民無所歸去爲盜及師定金門廈門總督姚啟聖請以界外地按籍還民弛海禁收魚鹽之利給軍食廷臣持不可康熙二十二年臺灣平上命以界外地還民會給事中傅感丁請以江浙閩粵濱海界外地招徠開墾乃命臻及內閣學士席柱赴福建廣東察視展界進臻工部尙書臻與席柱如廣東自欽州防城始遵海以東而北厯府七州三縣二十九衛六所十七巡檢司十六臺城堡砦二十一還民地二萬八千一百九十二頃復業丁口三萬一千三百復如福建自福州西分水關始遵海以北厯府四州一縣二十四衛四所五巡檢司三關城鎮砦五十五還民地二萬一千一十八頃復業丁口四萬八百於是兩省濱海居民咸得復業別遣使察視江南浙江展界復業同時畢事臻以母喪還里席柱復命奏陳濱海居民還鄉安業上曰民樂處海濱以可出海經商捕魚爾等知其故前此何以不准議行邊疆大臣當以國計民生爲念禁令雖嚴私出海貿易初未嘗斷絕凡議出海貿易不可行者皆總督巡撫自圖射利故也臻喪終起刑部尙書舊制方冬獄囚月給煤獄吏

率乾沒囚多以寒疾死臻力禁之調兵部時議裁各省駐防及督撫提鎮標兵  
臻謂兵冗可裁而不宜驟行請自今老弱物故額闕槩不補數歲額自減從之  
再調禮部以疾告歸尋卒於家上南巡書眷懷舊德額追賜之臻少貧力學事  
祖母及父母孝宏獎人才詩文剴切中條理

薩穆哈吳雅氏滿洲正黃旗人順治十二年進士授戶部主事遷員外郎康熙  
十二年聖祖允吳三桂疏請撤藩遣薩穆哈偕郎中党務禮席蘭泰主事辛珠  
筆帖式薩爾圖如貴州具舟及芻粟諭以毋騷擾毋遲悞既至三桂謀反提督  
李本深與謀書招貴州巡撫曹申吉總督甘文焜得之告薩穆哈等趣詣京師  
告變並請兵赴援薩穆哈與党務禮席蘭泰行至鎮遠三桂已舉兵鎮遠將吏  
得三桂檄不給驛馬薩穆哈党務理得馬二馳至沅州乃乘驛十一晝夜至京  
師詣兵部下馬喘急抱柱不能言久之始蘇上三桂反狀席蘭泰自鎮遠乘小  
舟至常德乃乘驛後七日至辛珠薩爾圖不及行死之十三年擢薩穆哈刑部  
郎中十四年敘告變功薩穆哈党務禮席蘭泰並應陞光祿太僕諸卿十五年

授太僕寺卿十六年再遷戶部侍郎命監賑山東十七年還京師疏言臣屢奉使命所過州縣間有藉差科派民財深滋擾累請嗣後有大事特遣部院官餘並責督撫料理上爲下廷臣會議定州縣科歛俱視貪吏治罪調吏部二十年再遷工部尙書二十一年命察視石景山至蘆溝橋石隄疏言隄內本官地康熙初招民墾荒致侵損隄根請敕部免其賦能勿復耕從之二十二年命察視山西地震疏請被災最重州縣發帑治賑二十四年河道總督靳輔請於高郵寶應諸州縣築隄束黃河注海按察使于成龍主濬海口下廷臣議用輔策上詢日講官籍江南者侍讀喬萊力請用成龍策上曰鄉官議如此未知民意如何令薩穆哈與學士穆成額會漕運總督徐旭齡巡撫湯斌詳察民間利害薩穆哈等行歷海口諸州縣諸州縣民陳狀參差不一檄諸州縣令各擇通達事體者十人詢利害皆言濬海口不便二十五年薩穆哈還奏謂詳問居民從成龍議積水不能施工從輔議水中亦不能取土請兩罷之是時成龍召詣京師上命廷臣及薩穆哈成龍再議成龍言濬海口當兼治串場河費至百餘萬廷

臣以爲費鉅疏請停未幾斌入爲尙書奏言海口不急濬再遇水下游諸州縣悉付巨浸上召問薩穆哈薩穆哈不堅執前奏復下廷臣議始定用成龍策上責薩穆哈前覆奏不實奪官尋授步軍翼尉三十二年仍授工部尙書三十九年上察知工部積弊河工糜帑受請託發銀多侵蝕詰責薩穆哈等薩穆哈尋以老疾乞罷上斥其僞詐命奪官仍留任察工部積弊一一自列四十三年以疏濬京師內外河道侵蝕帑銀薩穆哈得贖速治擬絞卒於獄

論曰米思翰贊撤藩之議綢繆軍食足以支十年知定謀有由也顧八代瑪爾漢皆文臣能克敵復以廉勤建績六善於軍事有建白收綠旗之用其效著於後矣鑠巡復海疆兵後一大政也薩穆哈以告變受賞亦附著於斯篇



清史稿

列傳五十六

索額圖

明珠

索額圖赫舍里氏滿洲正黃旗人索尼第二子初授侍衛自三等洊升一等康熙七年授吏部侍郎八年五月自請解任効力左右復爲一等侍衛及繼拜獲罪大學士班布爾善坐黨誅授索額圖國史院大學士兼佐領九年改保和殿大學士十一年世祖實錄成加太子太傅十五年大學士熊賜履票本有誤改寫草簽既又毀去索額圖與大學士巴泰杜立德等疏劾賜履坐罷歸十八年京察侍講學士顧八代隨征稱職翰林院以政勤才長注考索額圖改注浮躁竟坐降調品詳顧八代傳索額圖權勢日盛會地震左都御史魏象樞入對陳索額圖佔權貪縱狀請嚴譴上曰修省當自朕始翌日召索額圖及諸大臣諭曰茲遭地震朕反躬修省爾等亦宜洗滌肺腸公忠自矢自任用後諸臣家計頗皆饒裕乃朋比徇私益加貪黷若事情發覺國法具在決不爾貸是時索額圖明珠同柄朝政互植私黨貪侈傾朝右故諡及之上並書節制謹度榜賜焉

十九年八月以病乞解任上優旨獎其勤敏練達用兵以來贊畫機宜改命爲內大臣尋授議政大臣先是索額圖兄噶布拉以冊諡孝誠仁皇后推恩所生封一等公弟心裕襲索尼初封一等伯法保襲索尼加封一等公二十三年三月以心裕等懶惰驕縱責索額圖弗能效奪內大臣議政大臣太子太傅但任佐領並奪法保一等公二十五年授領侍衛內大臣時俄羅斯屢侵黑龍江邊境據雅克薩其衆去復來上發兵圍之察罕汗謝罪使費耀多囉等來議界二十八年上命索額圖與都統佟國綱往議索額圖奏謂尼布楚雅克薩兩地當歸我上曰尼布楚歸我則俄羅斯貿易無所棲止可以額爾固納河爲界索額圖等與議費耀多囉果執尼布楚雅克薩爲請索額圖等力斥之仍宣上意以額爾固納河及格爾必齊河爲界立碑而還二十九年上以裕親王福全爲大將軍擊噶爾丹命索額圖將盛京吉林科爾沁兵會於丹林敗噶爾丹於烏蘭布通以不窮追鏖四級三十五年從上親征率八旗前鋒察哈爾四旗及漢軍綠旗兵前行并命督火器營大將軍費揚古自西路抵圖拉上駐克魯倫河噶

爾丹遁走費揚古截擊之於昭莫多大敗其衆三十六年上還幸塞夏命索額圖督水驛會噶爾丹死敍功復前所鑄綬四十年九月以老乞休心裕代爲領侍衛內大臣索額圖事皇太子謹皇太子漸失上意四十一年上閱河至德州皇太子有疾召索額圖自京師至德州侍疾居月餘皇太子疾愈還京師是歲心裕以虐斃家人奪官四十二年五月上命執索額圖交宗人府拘禁諭曰爾爲大學士以貪惡革退後復起用罔知愧悔爾家人許爾留內三年朕意欲寬爾爾乃怙過不悛結黨妄行議論國事皇太子在德州爾乘馬至中門始下卽此爾已應死爾所行事任舉一端無不當誅朕念爾原係大臣心有不忍姑貸爾死又命執索額圖諸子交心裕法保拘禁諭若別生事端心裕法保當族誅諸臣黨附索額圖者麻爾圖領庫禮溫代邵甘修寶並命嚴錮阿米達以老貸之又命諸臣同祖子孫在部院者皆奪官江潢以家有索額圖私書下刑部論死仍諭滿洲人與偶有來往者漢官與交結者皆貸不問尋索額圖死於幽所後數年皇太子以狂疾廢上宣諭罪狀謂索額圖助允初潛謀大事朕知其情

將索額圖處死今允初欲爲索額圖報仇令朕戒慎不宥並按誅索額圖二子格爾芬阿爾吉善他日上謂廷臣曰昔索額圖懷私倡議皇太子服御俱用黃色一切儀制幾與朕相似驕縱之漸實由於此案額圖誠本朝第一罪人也

明珠字端範納喇氏滿洲正黃旗人葉赫貝勒金台石孫父尼雅哈當太祖滅葉赫來降授佐領明珠自侍衛授鑾儀衛治儀正遷內務府郎中康熙三年擢總管五年授弘文院學士七年命閱淮揚河工議復興化百駒塲舊開鑿黃河北岸引河旋授刑部尙書改都察院左都御史充經筵講官十一年遷兵部尙書十二年上幸南苑閱八旗甲兵於瞭鷹臺明珠先布條教使練習之及期軍容整肅上嘉其能因著爲令康熙初南疆大定留重兵鎮之吳三桂雲南尙可喜廣東耿精忠福建十餘年漸跋扈三桂尤驕縱可喜亦憂之疏請撤藩歸老海城精忠三桂繼請上召諸大臣詢方略戶部尙書米思翰刑部尙書莫洛等主撤明珠和之諸大臣皆默然上曰三桂等蓄謀久不早除之將養癰成患今日撤亦反不撤亦反不若先發因下詔許之三桂遂反精忠及可喜子之信皆

叛應之時爭咎建議者索額圖請誅之上曰此出自朕意他人何罪明珠由是稱上旨十四年調吏部尙書十六年授武英殿大學士屢充實錄方略一統志明史諸書總裁累加太子太師迨三叛既平上諭廷臣以前議撤藩惟明珠等能稱旨且曰當時有請誅建議者朕若從之皆含冤泉壤矣明珠既擅政黨不飭貨賄山積佛倫余國柱其黨也援引致高位靳輔督南河主築隄束水下游不溶自通于成龍等議溶下游與異議輔興屯田議者謂不便於民多不右輔明珠獨是其議蔡毓榮張汧皆明珠所薦引者也迨得罪按治恐累舉者傅輕比上諭斥始定與索額圖互植黨相傾軋索額圖生而貴盛性倨肆有不附己者顯斥之於朝士獨觀李光地明珠則務謙和輕財好施以招來新進異己者以陰謀陷之與徐乾學等相結索額圖善事皇太子而明珠反之朝士有侍皇太子者皆陰斥去薦湯斌傅皇太子即以傾斌會天久不雨光地所薦講官德格勒明易上命竄得夫因陳小人居鼎鉉天屯其脅語斥明珠事其德格勒傳二十七年御史郭琇疏劾明珠國柱背公營私閣中票擬皆出明珠指麾輕

重任意國柱承其風旨即有舛錯同官莫敢駁正聖明時有詰責漫無省改凡奉諭旨或稱善明珠則曰由我力薦或稱不善明珠則曰上意不喜我從容撓教且任意附益市恩立威因而要結羣心挾取貨賄日奏事畢山中左門滿漢部院諸臣拱立以待密語移時上意罔不宜露部院事稍有關係者必請命而行明珠廣結黨羽滿洲則佛倫格斯特及其族姪富拉塔塔錫珠等凡會議會推力爲把持漢人則國柱爲之囊橐督撫藩臬員缺國柱等展轉徵賄必滿欲而後止康熙二十三年學道報滿應陞者率往論價缺皆預定靳輔與明珠交結初議開下河以爲當任輔欣然欲行及上欲別任則以于成龍方沐上眷舉以應命而成龍官止按察使題奏權仍屬輔此時未有阻撓意也及輔張大其事與成龍議不合乃始一力阻撓明珠自知罪戾對人柔顏甘語百計款曲而陰行鷲害意毒謀險最忌者言官惟恐發其姦狀考選科道輒與訂約章奏必使先聞當佛倫爲左都御史見御史李興謙屢疏稱旨吳震方頗有彈劾卽令借事排陷明珠智術足以彌縫罪惡又有國柱姦謀附和負恩亂政伏冀立加嚴

謹疏入上諭吏部曰國家建官分職必矢志精白大法小廉今在廷諸臣自大學士以下惟知互相結引徇私傾陷凡遇會議一二倡率於前衆附和於後一意詭隨廷議如此國是何憑至於緊要員缺特令會同推舉原期得人亦欲令被舉者警心滌慮恐致累及舉者而貪黷匪類往往敗露此皆植黨納賄所致朕不忍加罪大臣且用兵時有曾著勞績者免其發覺罷明珠大學士交領侍衛內大臣酌用未幾授內大臣後從上征噶爾丹督西路軍釁敘功復原級明珠自罷政後雖權勢未替然爲內大臣者二十年竟不復柄用四十七年卒子性德揆敘自有傳余國柱字兩石湖廣大冶人順治九年進士授兗州推官遷行人司行人轉戶部主事康熙十五年考授戶科給事中時方用兵國柱屢疏言籌餉事語多精覈二十年擢左副都御史旋授江寧巡撫請設機製寬大綬疋得旨非常用之物何爲勞費當明珠用事國柱務罔利以迎合之及內轉左都御史遷戶部尙書湯斌繼國柱撫江蘇國柱索斌獻明珠金斌不能應由是傾之二十六年授武英殿大學士益與明珠結一時稱爲余秦檜會上謁陵中

途召于成龍入對成龍盡發明珠國柱等貪私上歸詢高士奇士奇亦以狀聞及郭琇疏論劾言者盡起國柱門人陳世安亦具疏糾之頗中要害國柱遂奪官既出都於江寧治第宅營生計復爲給事中何金閔所劾命逐之回籍卒於家佛倫舒穆祿氏滿洲正白旗人自筆帖式累遷內閣學士吳三桂既死其孫世璠猶據滇黔命佛倫總理糧餉通鎮遠連道旋兼理四川糧餉事平遷刑部侍郎尋遷左都御史擢工部尙書轉刑戶兩部先是下河工程斬輔與按察使于成龍議不協命佛倫借侍郎熊一瀟等勘議佛倫受明珠指議如輔言爲總漕募天顏所劾御史陸祖修亦劾佛倫袒輔且言九卿會議時尙書科爾坤等阿佛倫意尙書張玉書左都御史徐乾學言興屯所占民田應還之民科爾坤置不聞他九卿或不得見隻字上怒下部嚴議及郭琇劾明珠指佛倫爲明珠黨因解佛倫任召輔等廷對佛倫乃奏停屯田並汰前所設官部議奪佛倫官上命留佐領旋授內務府總管出爲山東巡撫疏請均賦役令紳民一體應役詔嘉其實心任事初濰縣知縣朱敦厚以贓私爲巡撫錢珏所發乞徐乾學請



於珏獲免且內擢主事至是事發下佛倫鞠實乾學坐奪官佛倫又劾琇知吳江縣時嘗侵公帑其父景昌故名爾標乃明御史黃宗昌奴坐賊黨誅琇改父名冒封典當追奪乾學故附明珠後相失或傳琇疏乾學實主之故佛倫以是報尋擢川陝總督入爲禮部尙書三十八年授文淵閣大學士三十九年琇入覲訟父受誣上詰佛倫自承不實當奪官授赦得免未幾以原品休致旋卒論曰康熙中滿洲大臣以權位相尙者惟索額圖明珠一時氣勢熏灼然不能終保令名卒以貪侈敗索額圖以附皇太子得罪禍延於後嗣明珠與索額圖競權不附皇太子雖被彈事能相聖祖猶念其贊撤藩力全之以視索額圖豈不幸哉若國柱佛倫則權門之疏附矣

清史稿

列傳五十七

郝浴

楊素蘊

郭琇

郝浴字雪海直隸定州人少有志操負氣節順治六年進士授刑部主事八年改湖廣道御史巡按四川時張獻忠將孫可望李定國等降明爲桂王將據川南爲寇師討之郡縣吏率軍前除授恣爲貪虐浴至嚴約束廉民間疾苦將吏始歛迹九年平西王吳三桂與固山額眞李國翰分兵復成都嘉定敘州重慶已而兩路兵俱敗三桂退駐綿州浴在保寧監臨鄉試可望將數萬人薄城浴飛檄邀三桂激以大義謂不死於賊必死於法逾月三桂乃赴援可望等引去浴在圍城中上詔詢收川方略疏言秦兵苦轉餉川兵苦待哺故必秦不助川而後秦可保川不翼秦助而後川可圍成都地大且要灌口一水襟帶三十州縣若移兵成都照籍屯田開耕一年可當秦運三年所難者牛種倘令土司出牛撫臣與立券豐年還其值當無不聽命嘉定據上游饒茶鹽令暫易穀種則

牛種俱不難辦也臣故謂開屯便川所患者滇寇也滇寇所恃不過皮兜布鎧烏銃刷刀善於騰山踰嶺蜀中土官土兵其技尤嫻於此若拔其精銳爲前茅以滿洲驍騎爲後勁疾雷迅霆賊必鳥獸散臣故謂用土兵便上以其言可探下部議部議謂戰守事當聽三桂主之遂報寢浴又言土賊投誠給劄授官恣行劫掠爲民害請嗣後願歸伍者歸伍願爲民者令有司造冊編丁免牛租除雜派就熟地開徵俾有定額疏議行三桂入四川浸驕橫部下多不法憚浴嚴正輒禁止沿路塘報浴上言臣忝司朝廷耳目而壅闕若此安用臣爲及保寧圍解頒賞將士三桂以冠服與浴浴不受疏言平賊乃平西王責臣司風憲不預軍事而以臣預賞非黨臣則忌臣也因陳三桂擁兵觀望狀三桂深銜之浴劾永寧總兵柏永馥臨陳退縮廣元副將胡一鵬驕悍不法並命奪官逮治降將董顯忠等以副將銜題授司道恣睢虐民浴復疏劾改原職三桂嗾顯忠等入京陳辨浴坐鑄秩去十一年大學士馮銓成克鞏呂宮等交章薦浴三桂乃抵浴保寧奏捷疏有親冒矢石語指爲冒功論劾部議當坐死上命寬之流徙

奉天大學士馮銓成克鞏呂宮皆以薦浴罷吏議浴至成所益潛心義理之學嗜孟子及二程遺書以致知格物頗其蘆刻苦厲志康熙十年聖祖幸奉天浴迎謁道左具陳始末上爲動容慰勞良久十二年三桂反尙書王熙給事中劉沛先薦浴爲部議所格十四年侍郎魏象樞復疏言浴血性過人才守學識臣皆媿不及使在西蜀操尺寸之權豈肯如羅森輩俯首從逆臣子立朝各有本末當日參浴者三桂也使三桂始終恭順方且任以腹心浴一書生耳即老死徒所誰復問之今三桂叛矣天下無不恨三桂卽無不憐浴浴當三桂身居王府手握兵柄不畏威不附勢致爲所仇三桂之所仇正國家之所取何忍棄之上乃召浴還復授湖廣道御史時陝西提督王輔臣叛應三桂浴疏言大兵進勦平涼宜於西安潼關用重兵屯駐以待策應用鄖陽之兵攻興安調河南之兵入武關直取漢中逆賊計日可擒上然之下其疏諸帥復請禁苛徵恤民因止督撫提鎮坐名題補之例章十數上皆中時弊十六年命巡視兩淮鹽政嚴別宿蠹增課六十餘萬准揚大饑發倉米振救全活甚衆十七年擢僉都御史

遷左副都御史十九年授廣西巡撫廣西新經喪亂民生凋瘵浴專意撫綏疏陳調劑四策請裁兵汰馬防要害簡精銳復請停鼓鑄改米徵銀復南寧太平思恩諸府縣行鹽舊制上輒報可時南疆底定滿洲兵撤還京師浴疏言撫標兵不宜裁減下部議留其半又請爲死事巡撫馬雄鎮傅宏烈建祠桂林知府劉浩知縣周岱生爲孫延齡所戕疏請予卹二十二年卒官喪歸士民泣送者數千里不絕初傅宏烈以軍事急移庫金七萬有奇米七千餘石供饗浴請以庫項扣抵及卒布政使崔維雅署巡撫劾浴侵欺命郎中蘇赫陳光祖往按如維雅言部議奪官追愆上知浴廉諭所動錢糧非入已從寬免追二十五年子林訟父冤復原官賜祭葬林字中美康熙二十一年進士授中書科中書歷吏部郎中亦以廉正稱累遷禮部侍郎加尙書銜致仕卒

楊素蘊字筠涓陝西宜君人順治九年進士授直隸東明知縣東明當河決後官舍城垣悉收民居殆盡遺民依邱阜僅數十家素蘊至爲繕城郭招集流亡三年戶增至萬餘山東羣盜任鳳亭等剽掠旁郡擾及畿南素蘊設計降其渠

散其脅從十七年舉卓異行取授四川道御史疏言臣言官也宜以言爲事然今天下所患正在議論多而成功少國家建官分職各有所事誠使司舉劾審財用任封疆理刑獄各舉其職則平天下無餘事更願皇上推誠御物肅大閑寬小管俾人人得展其才尤端本澄源之要也時吳三桂鎮雲南郡縣吏得自辟署謂之西選漸乃題用朝臣無復顧忌素蘊疏言三桂以上湖南道胡允等十員題補雲南各道并有奉差部員在內深足駭異爵祿者人主之大柄綱紀者朝廷之大防柄不可移防不可潰前此經略用人特命二部不得掣肘亦惟以軍前効用及所轄五省各官酌量題請從未聞敢以他行省及見任京官坐缺定銜者也且疏稱求於滇省既苦索駿無從求於遠方又恐叱馭不速則湖南四川距雲南猶近若京師山東江南相去萬里不知其所謂遠者更在何方皇上特假便宜不過許其就近調補若盡天下之官不分內外不論遠近皆可擇而取之何如歸吏部銓授尤爲名正言順縱或雲貴新經開闢料理乏人諸臣才品爲藩臣所素知亦宜請旨令吏部籤補乃徑行擬用不亦輕名器而褻

國體乎人臣忠邪之分起於一念之敬肆藩臣數歷有年應知大體此舉爲封疆計未必別有深心然防微杜漸當慎於幾先祈中飭藩臣嗣後惟力圖進取加意撫綏一切威福大權俱宜稟自朝廷則君恩臣誼兩盡其善疏下部十八年聖祖卽位輔臣柄政出素蘊爲川北道三桂見素蘊前奏惡之具疏辨並摘防微杜漸語謂意含隱射語伏危機詔責素蘊回奏素蘊言防微杜漸古今通義臣但期藩臣每事盡善爲聖世純臣非有他也下部議坐素蘊巧飾當降調罷歸居十年三桂反尙書郝惟訥莫如錫侍郎楊永寧交章請起用惟訥詞尤切略言素蘊首劾三桂云當防微杜漸在當日反狀未形似屬杞憂由今觀之則素蘊先見甚明且爲國直陳奮不自顧其剛腸正氣實有大過人者亟宜優錄乃命發湖廣軍前以原品用會丁父憂服闋乃赴軍前總督蔡毓榮題補湖廣提學道部議當以見辦軍務參議道題補十七年題補下荆南道時襄陽總兵楊來嘉副將洪福等叛應三桂大軍運餉自襄至房保路險陝舟車不通歲調襄陽安陸德安三郡丁夫擔負餉苦不繼素蘊訪知穀城有小溪可通舟乃

按行山谷開饑道由是水運通利省丁夫什九軍乃無乏邊山西提學道二十四年任滿薦舉擢通政司參議累遷順天府尹二十六年授安徽巡撫會歲饑上疏請賑甫拜疏卽檄州縣開倉賑給全活甚衆尋調湖廣巡撫夏逢龍亂初定脅從尙衆人情惶擾一夕數驚素蘊首嚴告許之禁反側以安二十八年大旱疏請蠲免武昌等屬三十二州縣錢糧上遺戶部郎中舒淑等會督撫勘災舒淑至武昌素蘊適患暑疾令布政使于養志從總督丁思孔往勸尋稱病乞休上疑其託疾奪官命甫下而素蘊已卒先是湖北郡縣疾苦最甚者如沔陽江陵漢陽嘉魚濱江地陷未蠲賦額咸甯黃陂景陵穀折江夏崇陽武昌通城漢陽漢川雲夢孝感應城穀田科重監利一年兩賦爲民害數十年素蘊得其實條爲兩疏未及上而病革口授入遺疏曰此疏行吾目瞑矣

郭琇字華野山東卽墨人康熙九年進士十八年授江南吳江知縣材力強幹善斷疑獄徵賦行版申法胥吏不能爲奸居官七年治行爲江南最二十五年巡撫湯斌薦琇居心恬淡莅事精銳請遷擢部議以琇徵賦未如額寢其奏聖



祖特許之行取授江南道御史時河督靳輔請停濬下河築高家堰重隄清丈  
隄外田畝以爲屯田謂可增歲收百餘萬巡撫于成龍議不合上令尙書佛倫  
往勘主輔議下九卿覈奏尙書張玉書左都御史徐乾學力言屯田擾民二十  
七年琇疏劾輔治河無功偏聽幕客陳潢阻濬下河上御乾清門召諸大臣下  
琇疏令會同察議尋輔入覲復召諸大臣與議琇申言屯田害民輔坐罷而擢  
琇僉都御史大學士明珠柄政與余國柱比頗營賄賂權傾一時久之爲上所  
覺琇疏劾明珠與國柱結黨行私詳列諸罪狀并及佛倫傅拉塔與輔等交通  
狀於是明珠等降黜有差琇直聲震天下遷太常寺卿再遷內閣學士二十八  
年復遷吏部侍郎充經筵講官擢左都御史疏劾少詹事高士奇與原任都御  
史王鴻緒植黨爲奸給事中何楷修撰陳元龍編修王頊齡依附壞法士奇等  
並休致回籍未幾御史張星法劾山東巡撫錢任貪黷任奏辨因及琇嘗致書  
屬薦卽墨知縣高上達等却之遂挾嫌使星法誣劾下法司訊獄未具琇疏言  
左都御史馬齊於會訊時多方鍛鍊必欲實以指使誣劾罪詔責琇疑揣尋法

司奏琇請託事實當奪官上以琇平日頗直敢言改降五級調用二十九年吏部推琇通政司參議上命改令予琇休致江甯巡撫洪之傑以吳江縣虧漕項事涉琇牒山東追琇赴質時佛倫爲山東巡撫因劾琇違例逗留希進用請奪官逮治又劾琇世父郭爾印乃明季御史黃宗昌家奴琇父郭景昌原名爾標嘗入賊黨伏法琇私改父名請誥封應追奪部議如所請逮赴江甯勘治坐侵收運船飯米二千三百餘石事發彌補議遣戍詔寬之三十八年上南巡琇迎駕德州既還京師諭大學士阿蘭泰等曰原任左都御史郭琇前爲吳江令居官甚善百姓感頌至今其人有膽量可授湖廣總督令馳驛赴任琇上官疏言黃州武昌二府兵米二萬七千有奇運給荊州鄖陽汛地懸隔千里輓輸費不貲請改折色江夏等十三州縣有故明藩產田瘠賦重數倍民糧請一律減徵江夏嘉魚漢陽三縣瀕江地水齧土墜有賦無田者三百餘頃請豁免皆允行三十九年入覲因奏言臣父景昌卽尋縣諸生有冊可稽邑匪郭爾標本無妻室妄得有子不知佛倫何所據誣臣并及臣父時佛倫爲大學士上詰之以外

錯對命仍予誥軸琇陛辭奏請清丈地畝並言湖南地廣人稀恐清丈後賦當差減上問當減幾何琇言當減十分之三上曰果益民雖倍於此亦不惜也尋條陳三事一嚴定築隄處分一停造無用糧船一通融調補苗疆官吏又疏禁徵賦諸弊政上嘉其實心除弊並允行時紅苗就撫琇陳善後之策請頒詔敕令勒石永遵四十年以病乞休上曰琇病甚思一人代之不可得能如琇者有幾人耶給事中馬士芳劾湖廣布政使任風厚久病巡撫年遐齡徇庇不以聞遐齡奏風厚實無病風厚入覲上見其未衰因曰任風厚若不堪任使郭琇豈肯徇庇耶未幾琇以病劇再疏求罷仍慰留黃梅知縣李錦催科不力琇委員摘印錦得民心民閉城拒之乞留錦御史左必蕃劾琇部議當奪官上以清丈未畢緩之四十一年鎮筸諸生李定等叩關奏紅苗殺掠總督巡撫匿不以聞而給事中宋駿業亦劾琇向熬虛聲近益衰廢持祿養癰乃命侍郎傅繼祖甘國樞浙江巡撫趙申喬往按會琇報清丈畢乞罷任上責其清丈稽延與前奏不合行不顧言並及匿報紅苗殺掠與黃梅拒命事琇自陳老病失察請治罪

初紅苗犯鎮寧遊擊沈長祿往勦至大梅山守備許邦坦千總孫清俱陷賊長祿私贖之歸諱不報而副將朱紱報苗已就撫琇據以入告繼祖等勘得狀琇與提督林本植並奪官五十四年卒尋祀鄉賢並祀吳江名宦

論曰郝浴楊素蘊秉剛正之性抗論強藩曲突徙薪防禍未形甘竄逐而不悔郭琇抨擊權相有直臣之風震逆一鳴僉壬解體蓋由聖祖已悟其奸而琇遂得行其志然以浴之廉蒙議於身後素蘊居官愛民不終於位琇則橫被誣陷廢置十年始獲申雪得君如聖祖猶不克善全直道難行不其然哉

清史稿

列傳五十八

徐乾學

字公元

王鴻緒

高士奇

徐乾學字原一江南崑山人幼慧八歲能文康熙九年一甲三名進士授編修十一年副蔡啓儔主順天鄉試拔韓炎於遺卷中明年魁天下文體一變坐副榜未取漢軍卷與啓儔並鐫秩調用諄復故官遷左贊善充日講起居注官丁母憂歸乾學父先卒哀毀三年喪葬一以禮及母卒如之爲讀禮通考百二十卷博采衆說剖析其義服闋起故官充明史總裁官累遷侍講學士二十三年乾學弟元文以左都御史降調其子樹聲與乾學子樹屏並舉順天鄉試上以是科取中南皿卷皆江浙人而湖廣江西福建無一與者下九卿科道磨勘樹屏等坐斥舉人是年冬乾學進詹事二十四年召試翰詹諸臣擢乾學第一與侍讀韓炎編修孫岳頌侍講歸允肅編修喬萊等四人并降敕褒獎賞資尋直南書房擢內閣學士充大清會典一統志副總裁教習庶吉士時戶部郎中色

榜額往福建稽察鼓鑄請禁用明代舊錢尙書科爾坤余國柱等議如所請乾學言自古皆新舊兼行以從民便若設厲禁恐滋紛擾因考自漢至明故事爲議以獻上然之事遂寢詔采購遺書乾學以宋元經解李燾續通鑑長編及唐開元禮或繕寫或仍古本綜其體要條列奏進上稱善時乾學與學士張英日侍左右凡著作之任皆以屬之學士例推巡撫上以二人學問淹通宜侍從特諭吏部遇巡撫缺勿預推未幾遷禮部侍郎直講經筵朝鮮使臣鄭載嵩訴其國王受枉語悖妄乾學謂恐長外藩跋扈劾其使臣失辭不敬宜責以大義上見疏獎謂有關國體已而王上疏謝罪二十六年遷左都御史擢刑部尙書二十七年典會試初明珠當國勢張甚其黨布中外乾學不能立異同至是明珠漸失帝眷而乾學驟拜左都御史即劾能江西巡撫安世鼎風諸御史風聞言事臺諫多所彈劾不避權貴明珠竟罷相衆皆謂乾學主之時有南北黨之目互相抨擊尙書科爾坤佛倫明珠黨也乾學遇會議會推輒與齟齬總河靳輔奏下河屯田下九卿會議乾學借尙書張玉書言屯田所占民地應歸舊業科

爾坤佛倫勿從御史陸祖修因劾科爾坤等偏袒河臣不顧公議御史郭琇亦劾輔興屯累民詔罷輔任湖廣巡撫張汧亦明珠私人先是命色楞額往獻上荆南道祖澤深焚賊各款並察汧有無穢迹色楞額悉爲庇隱御史陳紫芝劾汧貪黷命副都御史開音布會巡撫于成龍馬齊復訊汧澤深事俱實復得澤深交結大學士余國柱爲囑色楞額徇庇及汧遣人赴京行賄狀下法司嚴議時國柱已爲琇劾罷法司請檄追質訊並詰汧行賄何人汧指乾學上聞命免國柱質訊戒勿株連於是但論汧澤深色楞額如律事遂寢乾學尋乞罷疏言臣蒙特達之知感激矢報苞苴餽遺一切禁絕前任湖北巡撫張汧橫肆汧緣臣爲憲長拒其幣問是以銜憾誣攀非聖明在上是非幾至混淆臣備位卿僚乃爲貪吏誣搆皇上覆載之仁不加譴責臣復何顏出入禁廷有玷清班伏冀聖慈放歸田里詔許以原官解任仍領修書總裁事二十八年元文拜大學士乾學子樹穀考選御史副都御史許三禮劾乾學律身不嚴爲張汧所引皇上寬仁不加譴責卽宜引咎自退乞命歸里又復優柔繫戀潛住長安乘修史

爲名出入禁廷與高士奇相爲表裏物議沸騰招搖納賄其子樹穀不遵成例  
朦朧考選御史明有所恃獨其弟秉義文行兼優原任禮部尙書熊賜履理學  
醇儒乞立即召用以佐盛治乾學當逐出史館樹穀應調部屬以遵成例詔乾  
學復奏乾學疏辨乞罷斥歸田並免樹穀職疏皆下部議坐三禮所劾無實應  
鑄秩調用三禮益悲復列欵許乾學贓罪帝嚴斥之免降調仍留任是年冬乾  
學復上疏言臣年六十精神衰耗祇以受恩深重依戀徘徊三禮私怨逞忿幸  
聖主洞燭幽隱臣方寸靡甯不能復事鉛槧且恐因循居此更有無端彈射乞  
恩終始矜全俾得保其衰病之身歸省先臣邱隴庶身心閒暇願比古人書局  
自隨之義屏迹編摩少報萬一乃許給假回籍降旨褒嘉命攜書籍卽家編輯  
二十九年春陞辭賜御書光燄萬丈榜額未幾兩江總督傅臘塔疏劾乾學囑  
託蘇州府貢監等請建生祠復縱其子姪交結巡撫洪之傑倚勢競利請敕部  
嚴議語具元文傳上置弗問而予元文休致三十年山東巡撫佛倫劾濰縣知  
縣朱敦厚加收火耗論死并及乾學嘗致書前任巡撫錢瑛庇敦厚乾學與瑛



俱坐是奪職自是齟齬者不已嘉定知縣聞在上爲縣民訐告私派逮獄閱二年未定讞按察使高承爵窮詰在上自承嘗餽乾學子樹敏金至事發後追還因坐樹敏罪論絞會詔戒內外各官私怨報復樹敏得贖罪三十三年諭大學士舉長於文章學問超卓者王熙張玉書等薦乾學與王鴻緒高士奇命來京修書乾學已前卒遺疏以所纂一統志進詔下所司復故官翁叔元字寶林江南常熟人康熙十五年一甲三名進士授編修館試第一累遷國子監祭酒洊擢吏部侍郎遷工部尙書部例每有工作先計其直上之名曰料估工完多冒破所司不敢以聞有十年不銷算者大工至四十三案叔元蒞部甫半載積牘一清調刑部移疾歸卒叔元愛才而褊隘何焯在門下初甚賞之叔元疏劾湯斌焯請削門生籍叔元擯之竟不得成名以是爲世所誚云

王鴻緒初名度心字季友江南婁縣人康熙十二年一甲二名進士授編修十四年主順天鄉試充日講起居注官累遷翰林院侍講十九年聖祖諭獎講官勤勞加鴻緒侍讀學士銜時湖廣有朱方旦者自號二眉山人造中說補聚徒

橫議常至數千人自詡前知與人決休咎巡撫董國興劾其左道惑衆逮至京得旨寬釋及吳三桂反順承郡王勒爾錦駐師荊州方且以占驗出入軍營巡撫張朝珍亦稱爲異人上密戒勒爾錦勿爲所惑方且乃避走江浙會鴻緒得其所刊中質秘書遂以奏進列其誣罔君上悖逆聖道搖惑人心三大罪方且坐誅二十一年轉侍讀充明史總裁累擢內閣學士戶部侍郎二十四年典會試二十五年疏請回籍治本生母喪遣官賜祭二十六年擢左都御史疏劾廣東巡撫李士楨貪劣潮州知府林杭學嘗從吳三桂反乃舉其清廉士楨坐罷杭學奪職會靈臺郎董漢臣疏陳時事以諭教元良慎簡宰執爲言御史陶式玉劾漢臣摭拾浮言欺世盜名請逮治鴻緒疏言欽天監靈臺郎博士等官不擇流品星卜屠沽之徒粗識數字便得濫竽請敕下考試分別去留下部議行漢臣及博士賈文然等十五人並以詞理舛誤黜初以式玉疏下九卿集議尙書湯斌謂大臣不言慚對漢臣漢臣既黜鴻緒借左都御史瑋丹副都御史徐元珙合疏劾斌務名鮮實並追論江甯巡撫去任時巧飾文告以博虛譽上素

重斌清廉置弗問鴻緒論各省駐防官兵累民略言駐防將領恃威放肆或占奪民業或重息放債或強娶民婦或誑詐逃人株連良善或收羅奸棍巧生紮詐種種爲害所在時有如西安荊州駐防官兵紀律太寬牧放馬匹驅赴村莊累民芻秣百十成羣踐食田禾所至騷擾其他苦累又可類推請嚴飭將軍副都統等力行約束綠旗提鎮縱兵害民以及虛冒兵糧者不一而足請飭督撫立行指參上命議行未幾以父憂歸二十八年服闋將赴補左都御史郭琇勅鴻緒與高士奇招權納賄並及給事中何楷編修陳元龍皆予休致語具士奇傳嘉定知縣聞在上爲縣民訐告私派事按察使高承爵按治在上言嘗以銀餽舉人徐樹敏至事發退還因坐樹敏罪巡撫鄭端覆訊在上言嘗以銀五百餽鴻緒亦事發退還端乃劾乾學縱子行詐鴻緒竟染賊銀有玷大臣名節乞敕部嚴議上特諭曰朕崇尚德教獨濼煩苛凡大小臣工咸思恩禮下逮曲全始終卽因事放歸仍令各安田里近見諸臣彼此傾軋伐異黨同私怨相尋牽連報復雖業已解職投閒仍復吹求不已株連逮於子弟顛覆及於身家朕總

攬萬機已三十年此等情態知之甚悉姍嫉傾軋之害歷代皆有而明季爲甚公家之事置若罔聞而分樹黨援飛誣排陷迄無虛日朕於此等背公誤國之人深切痛恨自今以往內外大小諸臣宜各端心術盡蠲私忿共矢公忠儻仍執迷不悟復踵前非朕將窮極根株悉坐以朋黨之罪時鴻緒方就質詔至得釋三十三年以薦召來京修書尋授工部尙書充經筵講官四十七年調戶部其年冬皇太子允禔既廢詔大臣保奏儲貳鴻緒與內大臣阿靈阿侍郎揆叙等謀舉皇子允禔詔切責以原品休致五十三年疏言臣舊居館職奉命爲明史總裁官與湯斌徐乾學葉方霽互相參訂僅成數卷及臣回籍多年恩詔重領史局而前此纂輯諸臣罕有存者惟大學士張玉書爲監修尙書陳廷敬爲總裁各專一類玉書任志廷敬任本紀臣任列傳因臣原銜食俸比二臣得有餘暇刪繁就簡正謬訂譌如是數年彙分成帙而大學士熊賜履續奉監修之命檄取傳稿以進玉書廷敬暨臣皆未參閱臣恐傳稿尙多舛誤自蒙恩歸田欲圖報稱因重理舊編搜殘補闕復經五載成列傳二百八卷其間是非邪正

悉據公論不敢稍逞私臆但年代久遠傳聞異辭未敢自信爲是謹繕寫全稿  
齎呈御鑒請宣付史館以備參考詔俞之五十四年復召來京修書充省方盛  
典總裁官雍正元年卒於京乾隆四十三年國史館進鴻緒傳高宗命以郭琇  
劾疏載入使後世知鴻緒輩罪狀係與吾進士官吏部侍郎

高士奇字澹人浙江錢塘人幼好學能文貧以監生就順天鄉試充書寫序班  
工書法以明珠薦入內廷供奉授詹事府錄事遷內閣中書食六品俸賜居西  
安門內康熙十七年聖祖降敕以士奇書寫密諭及纂輯講章詩文供奉有年  
特賜表裏十匹銀五百十九年復諭吏部優敘授爲額外翰林院侍講尋補侍  
讀充日講起居注官遷右庶子累擢詹事府少詹事二十六年上謁陵于成龍  
在道盡發明珠余國柱之私駕旋值太皇太后喪不入宮以成龍言問士奇亦  
盡言之上曰何無人劾奏士奇對曰人孰不畏死帝曰若輩重於四輔臣乎欲  
去則去之矣有何懼未幾郭琇疏上明珠國柱遂罷相二十七年山東巡撫張  
所以齎銀赴京行賄事發逮治獄辭涉士奇會奉諭戒勿株連於是置弗問事

詳徐乾學傳士奇因疏言臣等編摩纂輯惟在直廬宣諭奏對悉經中使非進講或數月不覲天顏從未干涉政事不獨臣爲然前入直諸臣如熊賜履葉方寓張玉書孫在豐王士禎朱彝尊等近今同事諸臣如陳廷敬徐乾學王鴻緒張英勵杜訥等莫不皆然獨是供奉日久嫌疑日滋張汧無端疑怨含沙污讒臣將無以自明幸賴聖明在上誣構難施但禁廷清秘來茲萋斐豈容仍玷清班伏乞賜歸田里上命解任仍領修書事二十八年從上南巡至杭州幸士奇西溪山莊御書竹窗榜額賜之未幾左都御史郭琇劾奏曰皇上宵旰焦勞勵精圖治用人行政未嘗纖毫假手左右乃有原任少詹事高士奇左都御史王鴻緒等表裏爲奸植黨營私試略陳其罪士奇出身微賤其始徒步來京覓館爲生皇上因其字學頗工不拘資格擢補翰林令入南書房供奉不過使之考訂文章原未假之與聞政事而士奇日思結納諂附大臣攬事招權以圖分肥內外大小臣工無不知有士奇者聲名赫奕乃至如此是其罪之可誅者一也久之羽翼既多遂自立門戶結王鴻緒爲死黨給事中何楷爲義兄弟翰林陳

元龍爲叔姪鴻緒兄項齡爲子女嫻親俱寄以心腹在外招攬凡督撫藩臬道府廳縣及在內大小卿員皆鴻緒楮等爲之居停哄騙餽至成千累萬卽不屬黨護者亦有常例名之曰平安錢是士奇等之奸貪壞法全無顧忌其罪之可誅者二也光棍俞子易在京肆橫有年事發潛遁有虎坊橋瓦房六十餘間價值八千金餽送士奇此外順成門外斜街並各處房屋令心腹出名置買寄頓賄銀至四十餘萬又於本鄉平湖縣置田產千頃大興土木杭州西溪廣置園宅以寬館餽口之窮儒忽爲數百萬之富翁試問金從何來無非取給於各官官從何來非侵國帑卽剝民膏是士奇等眞國之蠹而民之賊也其罪之可誅者三也皇上洞悉其罪因各館編纂未竣令解任修書矜全之恩至矣士奇不思改過自新仍怙惡不悛當聖駕南巡上諭嚴戒餽送以軍法治罪惟士奇與鴻緒啓不畏死鴻緒在淮揚等處招攬各官餽送萬金潛遣士奇淮揚如此他處可知是士奇等欺君滅法背公行私其罪之可誅者四也王鴻緒陳元龍鼎甲出身儼然士林翹楚竟不顧清議依媚大臣無所不至苟圖富貴傷敗名教

豈不玷朝班而羞當世之士哉總之高士奇王鴻緒陳元龍何楷王頊齡等豺狼其性蛇蝎其心鬼蜮其形畏勢者既觀望而不敢言趨勢者復擁戴而不肯言臣若不言有負聖恩故不避嫌怨請立賜罷斥明正典刑天下幸甚疏入士奇等俱休致回籍副都御史許三禮復疏劾解任尙書徐乾學與士奇嫻親招搖納賄相爲表裏部議以所劾無據得寢三十三年召來京修書士奇既至仍直南書房三十六年以養母乞歸詔允之特授詹事府詹事尋擢禮部侍郎以母老未赴四十二年上南巡士奇迎駕淮安扈蹕至杭州及回鑾復從至京師屢入對賜予優渥上顧侍臣曰朕初讀書內監授以四子本經作時文得士奇始知學問門徑初見士奇得古人詩文一覽卽知其時代心以爲異未幾朕亦能之士奇無戰陳功而朕待之厚以其裨朕學問者大也尋遣歸是年卒於家上深惜之命加給全葬授其子庶吉士與爲編修尋諡文恪

論曰儒臣直內廷謂之書房存未入闕前舊名也上書房授諸皇子讀尊爲師傅南書房以詩文書畫供御地分清切參與密勿乾學士奇先後入直鴻緒亦



以文學進乃憑藉權勢互結黨援納賄營私致屢遭彈劾聖祖曲子保全乾學  
鴻緒猶得以書局自隨竟編纂之業士奇亦以恩禮終不其幸歟

清史稿

列傳五十九

湯若望

楊光先

南懷仁

湯若望初名約翰亞當沙耳姓方白耳氏日耳曼國人明萬歷間利瑪竇挾天算之學入中國徐光啓與游盡其術崇禎初日食失驗光啓上言臺官用郭守敬法歷久必差宜及時修正莊烈帝用其議設局修改曆法光啓爲監督湯若望被徵入局掌推算光啓卒以李天經代奏進湯若望所著書及恒星屏障迭與臺官測日食候節氣並考定置閏先後湯若望術輒驗莊烈帝知西法果密欲據以改大統術未行而明亡順治元年睿親王多爾袞定京師是歲六月湯若望啓言臣於明崇禎二年來京用西洋新法釐正舊曆製測量日月星晷定時考驗諸器近遭賊毀擬重製進呈將本年八月初一日日食照新法推步京師日食限分秒並起復方位與各省所見不同請數開列呈覽王命湯若望修正曆法七月禮部啓請頒曆王言治曆明時帝王所重今用新法正曆以敬

逆天休宜名時憲曆用稱朝廷愆天又民之至意自順治二年始即用新曆頒行天下湯若望復啓言敬授人時全以節氣交宮與太陽出入晝夜時刻爲重今節氣日時刻分與太陽出入晝夜時刻俱照道里遠近推算增加曆首以協民時前民用王獎其精確八月丙辰朔日有食之王令大學士馮銓與湯若望率欽天監官赴觀象臺測驗惟新法昭合大統回回二法時刻俱不協世祖定鼎京師十一月以湯若望掌欽天監事湯若望疏辭上不許又疏請別給敕印而以監印繳部謂治曆之責學道之志庶可並行不悖上亦不許並諭湯若望遵旨率屬精修曆法整頓監規如有怠玩侵紊卽行參奏加太僕寺卿尋改太常寺卿十年三月賜號通玄教師敕曰國家肇造鴻業以授時定曆爲急務義和而後如漢洛下閎張衡唐李淳風僧一行於曆法代有損益元郭守敬號爲精密然經緯之度尙不能符合天行其後晷度遂以積差爾湯若望來自西洋精於象緯閎通曆法徐光啓特薦於朝一時專家治曆如魏文魁等實不及爾但以遠人多忌成功終不見用朕承天眷定鼎之初爾爲朕修大清時憲曆迄

於有成又能潔身持行盡心乃事今特錫爾嘉名俾知天生賢人佐佑定曆補數千年之闕略非偶然也旋復加通政使進秩正一品欽天監舊設回科湯若望用新法久之罷回科不置十四年四月革職回科秋官正吳明炫疏言臣祖默沙亦黑等一十八姓本西域人自隋開皇己未抱其曆學重譯來朝授職曆官歷一千五十九載專管星宿行度順治三年掌印湯若望諭臣科凡日月交食及太陰五星陵犯天象占驗俱不必奏進臣察湯若望推水星二八月皆伏不見今於二月二十九日仍見東方又八月二十四日夕見皆闕象占不敢不據推上聞乞上復存臣科庶絕學獲傳並上十四年回科術推算太陰五星陵犯書日月交食天象占驗闕象別疏又舉湯若望舛謬三事一遺漏紫炁一顛倒帝參一顛倒羅計八月上命內大臣愛星阿及各部院大臣登觀象臺測驗水星不見議明炫罪坐奏事詐不以實律絞援赦得免康熙五年新安衛官生楊光先叩關進所著摘謬論選擇議斥湯若望新法十謬並指選擇榮親王葬期誤用洪範五行下議政王等會同確議議政王等議歷代舊法每日

十二時分一百刻新法改九十六刻康熙三年立春候氣先期起管湯若望妄奏春氣已應參甯二宿改調次序四餘刪去紫炁天祐皇上厯祚無疆湯若望祇進二百年曆選榮親王葬期不用正五行反用洪範五行山向年月俱犯忌殺事犯重大湯若望及刻漏科杜如預五品挈壺正楊宏量曆科李祖白春官正宋可成秋官正宋發冬官正朱光顯中官正劉有泰皆凌遲處死故監官子劉必遠賈文郁可成子哲祖白子質湯若望義子潘盡孝皆斬得旨湯若望効力多年又復衰老杜如預楊宏量勘定陵地有勞皆免死並令覆議議政王等覆議湯若望流徙餘如前議得旨湯若望等並免流徙祖白可成發光顯有泰皆斬自是廢新法不用聖祖既親政以南懷仁治理曆法光先坐譴黜復用新法時湯若望已前卒復通徼教師封號視原品賜卹改通玄曰通徼避聖祖諱也

楊光先字長公江南歙縣人在明時爲新安所千戶崇禎十年上疏劾大學士溫體仁給事中陳啟新昇棺自隨廷杖戍遼西國初命湯若望治曆用新法頒

時憲曆書面題依西洋新法五字光先上書謂非所宜用既又論湯若望誤以順治十八年閏十月爲閏七月上所爲摘謬闢邪諸論攻湯若望甚力斥所奉天主教爲妄言惑衆聖祖卽位四輔臣執政頗右光先下禮吏二部會鞠康熙四年議政王等定讞盡用光先說譴湯若望其屬官至坐死遂罷新法復用大統術除光先右監副疏辭不許卽授監正疏辭復不許光先編次其所爲書命曰不得已持舊說細湯若望願學術自審不逮遠甚既屢辭不獲乃引吳明烜爲監副明烜明炫兄弟行明炫議復回回科不得請至是明烜副光先任推算五年春光先疏言今候氣法久失傳十二月中氣不應乞許臣延訪博學有心計之人與之制器測候并飭禮部採宜陽金門山竹管上黨羊頭山拒黍河內葭莩備用七年光先復疏言律管尺寸載在史記而用法失傳今訪求能候氣者尙未能致臣病風痺未能董理下禮部言光先職監正不當自諉仍令訪求能候氣者是時朝廷知光先學術不勝任復用西洋人南懷仁治理曆法南懷仁疏劾明烜造康熙八年七政民曆於是年十二月置閏應在康熙九年正月

又一歲兩春分兩秋分種種舛誤下議政王等會議議政王等議曆法精微難以遽定請命大臣督同測驗八年上遣大學士圖海等二十人會監正馬祐測驗立春雨水兩節氣及太陰火木二星躔度南懷仁言悉應明烜言悉不應議政王等疏請以康熙九年曆日交南懷仁推算上問光先前劾湯若望議政王大臣會議以光先何者爲是湯若望何者爲非及新法當日議停今日議復其故安在議政王等疏言前命大學士圖海等二十人赴觀象臺測驗南懷仁所言悉應吳明烜所言悉不應問監正馬祐監副宜塔喇胡振銀李光顯皆言南懷仁曆法上合天象一日百刻歷代成法今南懷仁推算九十六刻既合天象自康熙九年始應按九十六刻推行南懷仁言羅瞻計都月孛推曆所用故入歷紫炁無象推曆所不用故不入曆自康熙九年始紫炁不必造入七政曆又言候氣爲古法推曆亦無所用嗣後並應停止請將光先奪官交刑部議罪上命光先但奪官免其罪南懷仁等復呈告光先依附僉拜將曆代所用洪範五行稱爲滅蠻經致李祖白等無辜被戮援引吳明烜誣告湯若望謀叛下議政

王等議坐光先斬上以光先老貸其死遣回籍道卒刑部議明烜坐奏事不實當杖流上命筭四十釋之

南懷仁初名佛迪南特斯姓阜泌斯脫氏比利時國人康熙初入中國時湯若望方黜楊光先爲監正吳明烜爲監副以大統術治曆節氣不應金水二星躔度舛錯明烜奏水星當見其言復不售乃召南懷仁命治理曆法南懷仁効光先明烜而去之遂授南懷仁監副時康熙八年三月南懷仁言是歲按舊法以十一月置閏以新法測驗閏當在九年正月既又言是月二十九日雨水乃正月中氣卽爲康熙九年之正月閏當在是年二月上命禮部詢欽天監官多從南懷仁乃罷八年十二月閏移置九年二月節氣占候悉用南懷仁說六月南懷仁請改造觀象臺儀器從之十二月儀器成擢南懷仁監正儀凡六曰黃道經緯儀曰赤道經緯儀曰地平經儀曰地平緯儀曰紀限儀曰天體儀並繪圖立說次爲靈臺儀象志十七年進康熙永年表表推七政交食爲湯若望未竟之書南懷仁續成之二十一年命南懷仁至盛京測北極高度較京師高二度



別爲推算日月交食表上之南懷仁官監正久累加至工部侍郎二十七年卒  
諡勤敏自是欽天監用西洋人累進爲監正監副相繼不絕五十四年命紀理  
安製地平經緯儀合地平象限二儀爲一乾隆中戴進賢徐懋德劉松齡傅作  
霖皆賜進士道光間高拱宸等或歸國或病卒時監官已深習西法不必復用  
西洋人奏奉宣宗諭停西洋人入監方聖祖用南懷仁許奉天主教仍其國俗  
而禁各省立堂入教是時各省天主堂已三十餘所雍正間禁令嚴盡毀去但  
留京師一所俾西洋人入監者居之入內地傳教輒緹以法迨停西洋人入監  
未幾海禁弛傳教入條約新舊教堂遍內地矣

論曰曆算之術愈入則愈深愈進則愈密湯若望南懷仁所述作與楊光先所  
攻訐淺深疏密今人人能言之其在當日嫉忌遠人牽涉宗教引繩批根互爲  
起仆誠一時得失之林也聖祖嘗言當曆法爭議未已己所未學不能定是非  
乃發憤擊討卒能深造密微窮極其闕奧爲天下主虛己勵學如是嗚呼聖矣

清史稿

列傳六十

李率泰

趙廷臣

耶廷佐

弟廷州 寧水清 水清子廷佐

佟鳳彩

麻勒吉

施維翰

李率泰字壽疇漢軍正藍旗人永芳子初名延齡年十二入侍太祖賜名年十六以宗室女妻之弱冠從太宗征察哈爾朝鮮及明錦州又從貝勒阿巴泰征山東並有功洊擢梅勒額真順治元年命以刑部參政兼任率師駐防錦州四月從睿親王多爾袞入關破李自成又率兵徇山東河南斬自成將趙應元降其衆萬人二年從豫親王多鐸破自成兵潼關移師南征克揚州下江甯分兵定蘇州松江諸郡江陰典史閻應元拒守督兵攻破之豫親王令駐防蘇州會明將吳志葵黃蜚等來犯時城兵僅千餘率泰使遠城張幟爲援兵狀志葵等斬關入勁騎突起截擊盡殲之三年從端重親王博洛平浙江福建敘功授

世職二等阿達哈哈番兼拖沙喇哈番五年鄭彩犯福建漳泉諸郡詔率泰與靖南將軍陳泰協剿斬獲甚衆復長樂連江二縣彩走復擒斬所署總督顧世臣等遂克興化寇攻福州十四月圍始解民食盡江西盜郭天才自杉關長驅至福州載米麥江上誘民出就食率泰師次建甯檄守吏嚴備乃夜焚洪山橋遁巡按御史周世科虐刑婪賄率泰疏劾寘諸法六年從征大同叛將姜瓖下保德州擒瓖黨牛化麟等敘功復加拖沙喇哈番初定官制改參政爲侍郎率泰仍以刑部侍郎兼梅勒額眞八年調吏部拜弘文院大學士條奏請懲貪酷官吏給滿洲兵馬草料酌量營造工程次第上從之未幾與大學士陳泰坐誤增恩詔赦款並罷任降世職爲拜他喇布勒哈番九年特進三等阿思哈尼哈番十年用大學士洪承疇薦授兩廣總督時明桂王朱由榔居安隆其將李定國擁兵廣西土寇廖篤增等應之十一年率泰遣兵進勦斬篤增於玉版巢十二年定國犯廣東率泰禦之敗其將高文貴會靖南將軍珠瑪喇率禁旅至合兵夾擊大破之復高雷二郡十三年加太子太保調閩浙總督率泰有方略善

用兵與士卒同甘苦時鄭成功據臺灣數人寇率泰疏請增設水師三千造哨船百餘艘招降海盜散其羽翼又言成功父芝龍不宜徙寧古塔其地近海恐乘間遁歸爲患滋大世祖悉用其言以破定國功進世職一等考滿加少保十五年招撫成功將唐邦杰林翀葉祿等降者數萬人十五年成功攻溫州陷平陽瑞安率泰調江寧滿洲兵助剿成功敗走是年詔分閩浙總督爲二以都統趙國祚督浙江駐溫州而以率泰專督福建駐福州未幾成功據南安嶺窺福州其黨陳斌既降復叛率衆據羅星塔率泰檄兵燔其巨艦千餘成功遁斌復降奏誅之十六年坐事奪世職任總督如故康熙元年率泰以漳州爲福建門戶奏增設水師二千尋與靖南王耿繼茂擊走定海小埕諸寇復與提督馬得功平萬安所擊走成功將楊宜是年成功死其子錦拒命如故部下漸携貳於是率泰復招降其將林俊奇陳輝何義魏明等三百餘人兵二千有奇統建寧延平邵武三路士卒剽內地山寇獲其渠王鐵佛斬之既錦率其將周全斌以五百餘人自梁山內犯率泰遣總兵王進加參將折光秋夾擊大破之復與靖

南王耿繼茂統舟師搗廈門取浩嶼金門二島錦霄遁三年降其將林國樑進兵八尺門降其將翁求多夜半渡海拔銅山斬級三千有奇其將黃廷等率兵民三萬餘人來降獲敵艦軍械無算錦僅以數十艘遁入臺灣敘功加秩正一品尋以病累疏乞休詔輒慰留五年卒官遺疏言海賊遠竄臺灣奉旨撤兵與民休息第將衆兵繁撤之驟易致驚疑遲又恐貽患今當安反側之心後須防難制之勢紅毛夾板船雖已回國然往來頻仍異時恐生釁至數年以來令沿海居民遷移內地失其故業宜略寬界限俾獲耕漁庶甦殘喘上聞優詔褒卹贈兵部尙書復世職諡忠襄

趙廷臣字君鄰漢軍鑲黃旗人順治二年自貢生授江蘇山陽知縣遷江甯同知有政聲坐催徵逾限免十年大學士洪承疇經略湖廣薦廷臣清幹題授下湖南道副使屢平冤獄十三年調督糧道十五年從定貴州遂擢授巡撫甫至官察民間疾苦定賦蠲振懲貪橫禁吏卒驛騷疏言貴州古稱鬼方自城市外四顧皆苗其貴陽以東苗爲夥而銅苗九股爲悍其次爲猓猓曰猓猓曰八番

子曰土人曰洞人曰蠻人曰冉家蠻皆黔東苗屬也自貴陽以西羅羅爲夥而黑羅爲悍其次曰仲家曰米家曰蔡家曰龍家曰白羅皆黔西苗屬也專事鬪殺馭之甚難臣以爲教化無不可施之地請自後應襲士官年十三以上者令入學習禮由儒學起送承襲其族屬子弟願入學讀書者亦許其仕進則儒教日興而悍俗漸變士官私襲支系不明爭奪易起釀成變亂令歲終錄其世次籍上布政司達部有爭襲者按籍立辨豫杜釁端並下部議行十六年擢雲貴總督土寇馮天裕陷湄潭犯魏安調兵擊卻之疏請改馬乃曹滴諸土司爲流官又言貴州屢被寇改衛爲府改所爲縣法令紛更民苦重役今應復舊制雲南田土荒蕪當招民開墾衝路州縣請以順治十七年秋糧貸爲春種資並下部議行吳三桂貢象五世祖命免送京廷臣因乞概停邊貢尤之十八年以平土酋龍吉兆功加兵部尙書是年調浙江敘雲南墾荒勞加太子少保康熙二年疏言浙江通賦不清由徵解繁雜請以一條鞭法令各州縣隨徵隨解布政司察明註册至爲簡易又疏言徵糧之法不一苟能寓撫字於催科卽百姓受

其福急公好義人情皆然有司止以箠楚爲能民安得不重利借債減價賣產錢糧完地方壞矣苟能得廉有司禁革火耗天平不欺天法馬不違法又禁絕差擾一酒一飯無不爲民節省民未有不交納恐後者徵糧之能在人不在法然不得其人而循法行之亦得半之道也實徵冊籍立實在戶名以杜詭卸流水紅簿送本府印發以防侵蝕易知山單徧散窮山深谷以絕橫索臣於浙屬立法通行催徵得法之吏請敕部酌議許題請獎勵又疏請移海島投誠官兵分插內地杜其煽誘定水師提鎮各營兵制以備水戰杭嘉湖三郡毗連太湖易藏奸宄請增造快號船撥兵巡哨詔並從之時鄭成功死廷臣招明魯王所署將軍阮美都督鄭殷侍郎蔡昌登等皆率衆來降惟張煌言散兵居定海山中執而殺之四年疏請崇節儉維風俗又言用人宜寬小管請敕部分別罪謾降革人員量才錄用又言民人鬻身旗下宜令有司給與印契並曉諭鄰里後或逃歸有容留者乃可坐以窩逃並議行時錢滯不行疏請令外省收銅開鑄準寶泉寶源兩局法式去各省分鑄之名以天下之錢供天下之用上命復各

省二十四監鑄錢浙東初平叛獄屢起廷臣平情讞鞫全活甚衆時海濱尙多餘孽聞廷臣寬大多解甲來歸康熙六年以病乞休詔慰留之八年巡海白福建還至奉化病卒諡清獻廷臣爲政寬靜而善折獄有瞽者入屠者室攫其筮中錢屠者逐之則曰欺吾瞽奪吾錢廷臣令投錢水中見浮脂以錢還屠者有殺人獄已誣服廷臣察傷格曰傷寸而刃尺必冤也更求之得眞殺人者早山中人言魃見入人家輒失財物廷臣曰盜也令吏捕治之袁懋功字九敘順天香河人順治二年進士授禮科給事中疏請慎簡學官磨勘文體釐定禮制又以前明廢官援恩詔踵至請敕吏部會都察院嚴覈才品累擢戶部侍郎十七年世祖諭懋功才品敏練授雲南巡撫時雲南初定懋功令降卒入籍歸農墾無主之田編保甲以時稽察奏減屯田糧額請停派部員履勘田畝撫雲南九載政績大著以父憂去服除起山東巡撫康熙十年濟南五十六州縣衛新墾地被淹懋功疏請展限一年起科部格不行上特允之調浙江未行卒諡清獻徐旭齡字元文浙江錢塘人順治十二年進士除刑部主事再遷禮部郎中康熙



熙六年授雲南道御史裁缺改湖廣道迭疏請汰額外衙役核州縣贖錢降調官百姓保留敕督撫核實旨下部議行命偕御史席特納巡視兩淮鹽政疏陳積弊請嚴禁斤重不得逾額部議如所請勒石又疏請停止豫徵鹽課部議不允遷太常寺少卿累擢左僉都御史請裁軍興以後增設道員二十二年授山東巡撫二十三年遷工部侍郎復出爲漕運總督疏請釐三害籌三便革隨漕增裁運耗二項及民間幫貼盤費歸價各省給軍款項改由州縣運發運丁行月糧改入現運項下撥給並合併漕船帮次皆下九卿議行二十六年卒亦設清獻

耶廷佐字一柱漢軍鑲黃旗人世籍廣甯父熙載明諸生太祖克廣甯熙載來歸授防禦以軍功予世職游擊崇德元年卒長子廷輔嗣廷佐其次子也自官學生授內院筆帖式擢國史院侍讀順治三年從肅親王豪格徇四川平張獻忠六年從英親王阿濟格討叛將姜瓖遷秘書院學士十一年授江西巡撫江西自明末海遭兵亂逋賦鉅萬廷佐累疏請蠲緩蘇民困詔允行土寇洪國柱

等掠饒州廣信遣兵剿平之十二年擢江南江西總督江南通賦至四百餘萬廷佐覈賦籍曰此非盡民困不能輸也必有官吏侵蝕而詭稱民通者民困可矜官吏弊不可不革乃籍之爲三曰官侵曰吏蝕曰民通責右布政使按籍督催而令左布政使稽征新賦以除新舊牽混之弊並疏請官吏徵賦未完者令戴罪留任催徵於是宿弊頓革師行取估船以濟商民交困廷佐疏請視江西例發帑造船備用上題其言命議行十六年巡閱江海因密疏言鄭成功屯聚海島將犯江南南汛兵無多水師舟楫未備請調發鄰省勁兵防禦事格不行未幾成功陷鎮江襲瓜洲遂窺江甯城守單弱會梅勒額眞噶楚哈瑪爾賽自貴州旋師廷佐與駐防總管喀喀木邀入城共禦敵挫其前鋒得舟二十餘成功兵大至戰艦蔽江廷佐登埤固守提督管效忠總兵梁化鳳等水陸夾擊焚敵艦五百餘擒斬無算成功遁入海捷聞詔嘉獎十八年分江南江西總督爲二以廷佐專督江南康熙四年復舊制仍兼江西七年以疾解任致仕大學士金之俊家居得匿名書帖詆其曾降李自成之俊訴廷佐令有司窮治上聞

慮株連無辜責之俊違例妄訴廷佐侯病痊起用鐫二秩十三年耿精忠反授廷佐福建總督廷佐奏言臣係爲耿氏婿臣與精忠有連然誓不與賊俱生願力疾前驅殲除叛寇上嘉之賜鞍馬甲冑以寵其行廷佐至浙江從大將軍康親王傑書治軍駐金華疏陳精忠句結海寇宜勦撫兼施上曰海寇當撫精忠當用勦或用問廷佐頗有規畫未及行十五年卒於軍賜祭葬江南江西俱祀名宦弟廷相字鈞衡初授欽天監筆帖式累官四川左布政使四川屢經兵燹廷相蒞任百廢具興民不知擾康熙八年授河南巡撫廷佐卒上即擢廷相爲福建總督會精忠降餘黨紀朝佐張八等尙抗拒廷相勦撫兼用旬月悉平鄭錦及山寇朱寅屢犯郡縣遣兵分剿屢却之擒斬甚衆十七年錦窺漳州據玉州等寨分擾石碼江東橋廷相請援詔康親王督兵協剿時寇勢甚張上責廷相庸懦不能殄賊命解任二十七年卒耶永清字定庵初授禮部筆帖式出知山西渾源州招民開墾豁逋賦萬餘姜瓖黨高山等竄伏山谷間爲盜永清簡丁壯親率搜捕多斬獲事平擢江西贛州知府平反冤獄居官有聲師討李定

國議牧馬贛州民譁言兵且入城爭竄避永清度城外地爲牧場區置八旗駐營具芻茭兵不入城贛民安堵帥還徵民夫數千挽舟灘水湍激永清慮民夫無食且逃以大艦載米尾其後軍行無滯民德之爲立象祠焉從子廷佐巡撫江西永清例回避調山西汾州遼山東東昌道副使轉湖廣下荆南道李自成黨踞房竹間官軍分路會剿餽餽俱取給郢襄陸路挽運議徵民夫數萬永清疏水道倣古轉般法安塘遞運軍得無匱累遷湖南布政使衡永寶三郡苦食粵鹽灘險道遠商民交病永清申請改食淮鹽民便之康熙十二年調河南師討吳三桂議養馬南陽永清請移牧湖廣河南協濟湖廣軍米十萬石申巡撫題請改於江南江西採運在官十二年課最二十五年擢山東巡撫未幾卒官祀湖南名宦永清子廷極廷棟廷極字紫衡初授江甯府同知遷雲南順寧知府有政聲累擢江西巡撫江西多山州縣運糧盤兌民間津貼夫船耗米五斗三升載賦役全書歲分給如法戶部初議駁減總督范承勳以請得如故至是戶部復議停給併追前已給者廷極累疏爭之尋兼理兩江總督五十一年擢

漕運總督卒設溫勳廷棟字樸齋官湖南按察使

佟鳳彩字高岡漢軍正藍旗人養性從孫也初授國史院副理事官外改順天香河知縣內擢山西道御史出視河東鹽政順治七年巡按湖南八年外轉湖廣武昌道參議遷廣西右布政使時師征雲南道廣西供億浩繁鳳彩籌濟無匱調江西左布政使十七年擢四川巡撫四川經張獻忠亂城邑殘破勸官吏捐輸修築成都府城葺治學宮濬都江大堰以祖母憂去官康熙六年起貴州巡撫疏言驛站累民而貴州尤苦層山峻嶺俗言地無三里平行一站馬則蹄癢脊爛夫則足破肩穿應於重安江楊老堡黃絲舖盤江坡江西坡轆轤坡等六處增置驛站設夫馬如額復言黔省田土多奇零國初隸版圖州縣衛所等官不諳賦役任意牒報戶部以明季賦役全書發黔訂正原報多者不復更改少者照數增添臣蒞任酌定絲單規式飭所司填給花戶以杜私派嗣各屬造報此多彼縮不能照則填給且田地名色甚多錢糧輕重不一見飭所司清釐更正賦役全書以垂永久詔並允行丁母憂十一年起河南巡撫彰德舊有萬

金渠康熙七八年水患三至鳳彩奏請修濬以弭民害尋疏言豫省歲修黃河用夫多或至萬餘俱按畝起派雇直年需三四十萬小民重困請改爲官雇按通省地畝等則派銀刊明絲單若遇意外大工再具題請旨上以派銀雇夫仍屬累民命並免之十二年鳳彩疏言均平里甲直省通行河南雖有里甲之名其實多者每里或五六百頃少者止一二百頃或寥寥數頃有司止知照例編差里小田少難以承役愈增苦累今飭州縣按徵糧地畝册如一州縣有地一千頃原分爲十里者每里均分一百頃一里之中各分十甲每甲均分十頃遇有差徭按里甲分當則豪強無計規避貧弱不致偏枯又言豫省民間栽柳供河工採辦歲需百餘萬束自康熙七年以後協濟江南河工已二百七十餘萬束去歲陽武險工無柳可用將民間桃李梨杏盡行斫伐方事堵禦是修防本省河工尙屬不敷實難協濟外省且黃河渡船裝柳止二三百束至無船之地官吏束手若非亟圖變通必至誤運向例本省河工運柳每束給銀五分今遠運江南千里之外止給銀四分五釐民安得不賠累乞敕河臣於江南雇船到

豫使民止備柳束輓運江干嗣後就江南鄰近無河患處酌派協濟留河南有餘不盡之柳以備本省河患庶百姓稍得蘇息大工不致遲誤疏入並下九卿科道議行河南民稱均里甲獨夫柳爲利民二大疏吳三桂反河南當通衢風彩悉心調度民不知擾十三年以疾乞休許之士民赴闕願留左都御史姚文然疏言風彩撫豫數載民所愛戴宜令力疾視事命仍留任十六年卒官設勳僖河南四川貴州並祀名宦

麻勒吉瓜爾佳氏滿洲正黃旗人先世居蘇完有達邦阿者當太祖時來歸麻勒吉其曾孫也順治九年滿漢分榜麻勒吉以繙譯舉人舉會試第一殿試二甲第一授修撰世祖器之十年諭麻勒吉兼通滿漢文氣度老成擢弘文院侍講學士十一年擢學士充日講官教習庶吉士編纂太祖太宗聖訓副總裁經筵講官明將孫可望詣經略洪承疇軍降封義王命麻勒吉爲使學士胡兆龍奇徹伯副之齎敕印授之卽偕詣京師麻勒吉初與直隸總督張玄錫同官學士使還玄錫迎於順德麻勒吉訶辱之玄錫憤自剄不殊巡撫董天機以玄錫

手書遺疏上聞上遣學士哲庫納侍郎霍達往按玄錫復疏言麻勒吉於迎候時面斥失儀又責以前此南行不出迎且云在南方洪經略日有饋遺何等盡禮奇徹伯又索臣驛駝臣因賄賂干禁不與上責麻勒吉等逼迫大臣任意妄行下九卿會勘玄錫直隸清苑人明庶吉士順治初授原官自檢討累遷至學士上稱其勸敏擢宣大總督移督直隸河南山東至是以聽勘詣京師居僧寺自縊九卿議麻勒吉等當奪官籍沒上寬之削加級奪誥敕而已十六年以雲南初定發帑金三十萬命麻勒吉偕尙書伊圖左都御史能圖往賑並按大將軍貝勒尙善縱兵擾民狀麻勒吉爲奏辨尋安親王岳樂覆勘尙善兵入永昌掠民婦事實麻勒吉坐徇庇奪官十八年命以原銜入直上大漸召麻勒吉與學士王熙撰擬遺詔付內廷侍衛賈卜嘉進奏上命麻勒吉懷詔草俟上更衣畢與賈卜嘉奏知皇太后宣示諸王貝勒是夕上崩麻勒吉遵旨將事旋授秘書院學士康熙五年擢刑部侍郎七年授江南江西總督時蘇州松江類遭水患布政使慕天顏議濬吳淞江劉河口麻勒吉因與巡撫瑪祐疏請以各府漕



折銀十四萬充工費淮揚被水坍沒田地請永免歲賦詔並允行鎮江駐防兵  
許將軍李顯貴知府劉元輔侵冒錢糧遣學士折爾肯等往按得實麻勒吉坐  
不先舉發並械繫至京聽勘給事中姚文然疏言麻勒吉罪狀未定宜寬鎖繫  
上然之尋命復任十二年大計左邊兵部督捕理事官吳三桂反定南王孔有  
德婿孫延齡及提督馬雄以廣西叛應之十六年命赴簡親王喇布軍招撫延  
齡比至桂林延齡已爲三桂所殺其部將劉彥明等率衆降十八年詔麻勒吉  
赴廣西護諸軍時雄已死其子承慶降授招義將軍封伯爵已部兵以饑饉譁  
麻勒吉上言承慶與黃明葉秉忠皆賊帥歸誠今承慶授高爵而明秉忠未調  
官故陰嗾兵士爲變秉忠年老無異志惟明強悍爲柳州官兵所懾服若不調  
用他所終恐爲害乃授明總兵官明復叛詔麻勒吉與偏沅巡撫韓世琦會剿  
尋報爲苗人所殺十九年巡撫傅宏烈剿賊至柳州承慶復叛宏烈遇害命麻  
勒吉兼攝巡撫事時柳州再變民多逃竄田荒賦湮麻勒吉招撫流亡令歸故  
業葺學宮振興文教頗著治績二十一年撤故定南王所部分隸八旗漢軍麻

勒吉率以還京二十三年授步軍統領二十八年卒三十七年兵部奏黃明爲貴州參將上官斌等所擒麻勒吉迫坐妄報奪官江南民爲麻勒吉立碑兩花臺紀績祀名宦阿席熙瓜爾佳氏滿洲鑲紅旗人自兵部筆帖式四邊光祿寺卿考滿輔政大臣鼐拜等令解任隨旗行走復坐事奪官聖祖親政鑒其無罪命以郎中用七年超擢陝西布政使舉卓異擢巡撫康熙十二年遷江南江西總督耿精忠叛窺江西阿席熙發兵赴剿並檄援浙江未幾精忠陷廣信建昌饒州參將陳九傑等應之阿席熙遣兵防徽州城陷績溪婺源擾及徽州迭克之簡親王喇布率師至江甯以阿席熙參贊軍務十七年疏報江南清出隱漏田地一萬四千餘頃山八百餘里加兵部尙書尋坐贍徇巡撫慕天顏奏銷浮冒罷任卒阿席熙居官廉潔江南士民德之祀名宦瑪祐哲柏氏滿洲鑲紅旗人順治九年繙譯進士授佐領兼刑部員外郎遷欽天監監正康熙八年江甯巡撫缺命議政大臣等會推滿洲郎中以上學士以下通漢文有才能者備擢用舉奏皆不當上意特以命瑪祐九月夏淮安揚州二府久雨田廬多淹詔發

帑振濟瑪祐疏請蠲免桃源等縣積欠賦銀及六七兩年未完漕米部議漕米無蠲免例上特允其請並蠲減蘇松常三府被災歲賦十年疏言蘇松二府額賦最重由明洪武初以張士誠竊據其地遷怒於民取豪戶收租籍付有司定賦額較宋多七倍元多二倍是以民力困竭積逋遂多自康熙元年至八年民欠二百餘萬催徵稍急逃亡接踵舊欠仍懸新逋復積請敕部覈減二府浮糧以期歲賦清完疏下部議以科則久定報寢時布政使慕天顏請濬吳淞江劉河瑪祐與總督麻勒吉請以漕折十四萬充費給事中柯聳疏言東南水利宜乘此興工盡疏各支河下瑪祐覆勘瑪祐言各州縣支河皆已疏通吳江縣長橋乃太湖洩水要道應令開濬未幾以京口將軍李顯貴等侵饒事覺坐不先舉發呈吏議當左遷命留任十二年黃淮水漲清水潭石隄決高郵等十八州縣衛所被災瑪祐奏請發帑振濟十五年霪雨久不霽以憂卒遺疏極陳水災民困無一語及私詔褒惜諡清恪

施維翰字及甫江南華亭人順治九年進士授江西臨江推官清漕弊善折獄

姦頑斂迹巡撫耶廷佐奏其治行舉卓異內擢兵部主事改山東道御史疏言  
察吏首重懲貪尤宜先嚴大吏各督撫按露章彈劾宜及監司勿僅以州縣塞  
責又言糾舉之法密於文疏於武鎮帥擁重兵有庸碌衰憊緩急難恃者有縱  
恣婪贓肆虐軍民者督撫按徇隱弗糾事發同罪詔並議行十七年出按陝西  
聖祖即位裁巡按維翰乞假歸康熙三年復授江南道御史疏言直省錢糧每  
委府佐協徵所至舖設供給不免擾民甚或縱容胥役橫肆誅求請概行禁止  
以專責成杜擾害下部飭禁巡鹽河東徵課如額八年疏劾偏沅巡撫周召南  
徇庇貪吏十一年疏劾福建總督劉斗徇情題建故靖南王耿繼茂祠召南斗  
並坐譴十一年內升以四品服俸仍留御史任疏言設登聞鼓原以伸士民冤  
抑故使科道共與其事然每收訴狀必待科道六十餘員集議輒致稽延請用  
滿漢科道各一員司之半年更易從之遷鴻臚寺少卿累遷左副都御史浙江  
巡撫陳秉直薦舉學道陳汝璞爲左都御史魏象樞所劾秉直應降調以加級  
抵銷維翰言秉直與汝璞見聞最近乃徇情妄舉非尋常註誤可比請敕部定

議凡保舉非人坐降調者不許抵銷上然之因著爲例給事中李宗孔繼劾秉直坐左遷十八年授山東巡撫會歲祲民多流亡維翰疏請振恤並截留漕米五萬石發濟南倉存貯散給饑民又疏言青萊等府距臨清倉遠辦解甚艱請永行改折以息轉輸民大悅服二十一年代李之芳爲浙江總督之芳按治軍士鼓譟繫累二百餘人維翰至卽日定讞多平反二十二年冬調福建未上官二十三年春卒諡清惠

論曰李率泰鎮福建禦鄭成功父子趙廷臣督浙江執張煌言有功於戡定耶廷佐釐逋賦修鳳彩均里甲獨夫柳爲民祛害麻勒吉初奉使迫張玄錫至死高宗諭斥其縱恣然於江南有惠政阿席熙瑪祐清望尤過之施維翰在臺敢言出持綱節措置得大體皆康熙初賢大吏也愷悌君子屏藩王國厥績懋矣